

## Ministar pravde Bariša Čolak za Oslobođenje ponovio



Bariša Čolak: Nismo se tako dogovorili

# Nećemo isporučivati naše građane

## Čolak misli da srbijanska ministrica pravde odlaskom u Lyon ne doprinosi rješenju problema

Državni ministar pravde Bariša Čolak kazao je za Oslobođenje da Bosna i Hercegovina neće isporučivati svoje građane drugim državama, bez obzira na vrstu raspisane tjeralice.

### Pogrešna odluka

Čolak je ustvrdio da odluka srbijanske ministricе pravosuđa Snežane Malović da posjeti centralu Interpolu u Lyonu, s ciljem reaktiviranja crvenih tjeratica protiv bh. građana, u trenutku kada se ozbiljno radi na rješavanju problema dvostrukog procesuiranja između pravosudnih institucija dviju država, nije doprinos za rješenje.

Podsjećamo da su se ministri pravde BiH i Srbije susreli u Sarajevu krajem juna 2009. i tada razmotrili pitanja koja opterećuju odnose dviju država. Između ostalih i pitanje vođenja duplih postupaka u predmetima ratnih zločina. Tom su sastanku prisustvovali i tužioc Milorad Barašin i Vladimir Vukčević. Zajednički zaključak sastanka bio je da procesuiranje ratnih zločina doprinosi poboljšanju odnosa između BiH i Srbije.

- Tom prigodom, kao i više puta ranije, iznijet je naš stav da procese vezane za ratne zločine počinjene na području Bosne i Hercegovine, ako su počinio bh. državljani, treba da vode isključivo nadležni organi u Bosni i Hercegovini. U skladu sa zaključkom dva ministra 15. i 16. jula 2009. godine u Sarajevu je održan sastanak ekspertnih timova dvaju ministarstava, sa ciljem realizacije navede-

**SAGLASNOST U najvećem dijelu ekspertne grupe su postigle saglasnost, te su kao ključni elementi za vođenje krivičnih postupaka u predmetima ratnih zločina navedeni državljanstvo i prebivalište lica koja se procesuiraju**

nih zaključaka, ali i ugovornog regulisanja izbjegavanja dvostrukog procesuiranja. U najvećem dijelu ekspertne grupe su postigle saglasnost, te su kao ključni elementi za vođenje krivičnih postupaka u predmetima ratnih zločina navedeni državljanstvo i prebivalište lica koja se procesuiraju. Konačan tekst ugovora biće usaglašen na slijedećem sastanku ekspertnih timova koji će se održati u Beogradu, najvjerovatnije u septembru ove godine, rečeno nam je u Ministarstvu pravde.

### Argumentacija?

Zbog svega ovog, Čolak smatra da potez ministricе Malović ne doprinosi rješavanju problema između BiH i Srbije.

Malović je, podsjećamo, izjavila da u Lyon odlazi kako bi Interpolu prezentirala argumentaciju u vezi sa potjernicama protiv 19 bh. državljana, zbog navodnih zločina počinjenih u Dobrovoljačkoj ulici u Sarajevu.

J. F.

# Željko Komšić u Briševu kod Prijedora Pošta za 68 masakriranih Hrvata

Ovaj zločin je sastavni dio optužnice protiv haškog optuženika i bivšeg predsjednika RS-a Radovana Karadžića, kazao je Komšić

Predsjedavajući Predsjedništva BiH Željko Komšić posjetio je jučer selo Briševo u opštini Prijedor, gdje je prisustvovao obilježavanju 17. godišnjice masakra nad 68 civila hrvatske nacionalnosti. U sklopu kampanje etničkog čišćenja u Bosanskoj krajini 25. jula 1992. godine, na lokalitetu sela Briševo, pripadnici bivše Vojske RS-a ubili su i masakrirali 68 civila hrvatske nacionalnosti.

Komšić je napomenuo da je ovaj zločin sastavni dio optužnice protiv haškog optuženika i bivšeg predsjednika RS-a Radovana Karadžića.

"To možemo zahvaliti uredu za vezu sa Haškim tribunalom, koji radi pri mom kabinetu, a koji je prošle godine, nakon hapšenja Radovana Karadžića, dokumentovao i ovaj zločin", istaknuo je Komšić u izjavi novinarima. On se založio za procesuiranje svih odgovornih za počinjene ratne zločine tokom proteklog rata u BiH.

"Postoji opća volja kod svih normalnih ljudi da ta priča bude što prije završena. Međutim, institucije su ispolitizirane i u toj politizaciji sve se rasplinjuje", kazao je Komšić i ipak ukazao da treba vjerovati u pravdu i kada ona izgleda daleka i nedostižna, prenijela je Fena.

Iznio je i stav da je BiH "prepuna sličnih mjesta kao Briševo, gdje su nevini životima platili ludilo zločina koje je vlada u to vrijeme".



Komšić u Briševu: Bez milosti prema ratnim zločincima

## Posjeta Halimi Ibrahimović

Željko Komšić je u selu Gornji Agići posjetio Halimu Ibrahimović, kojoj su 20. jula 1992. pripadnici bivše Vojske RS-a, u sklopu kampanje etničkog čišćenja nesrpskog stanovništva, ubili pet sinova i supruga, a čiji su posmrtni ostaci ekshumirani iz masovne grobnice Jakarina kosa u septembru 2001. godine.

Predsjedavajući Predsjedništva BiH je još dodao i da ima još mnogo žrtava koje nisu pronađene, te previše porodica koje nisu našle ni u tom smislu neki svoj smiraj.

Komšić je, kako prenosi Srna, kazao da ni prema jednom pojedincu koji je počinio ratni zločin ne treba imati milosti.

"Na stranu ratne zasluge i herojstvo, ratni zločin zaslužuje kaznu bez obzira ko je u pitanju", rekao je Komšić, komentarišući televizijske snimke na kojima ratni komandant 5. korpusa Armije BiH Atif Dudaković navodno naređuje strijeljanje ratnih zarobljenika u Izačiću.

Na pitanje da prokomentariše svoju raniju izjavu da je Dudaković "častan general koji je branio BiH", Komšić je rekao da nije promijenio mišljenje kada je riječ, kako je naveo, o Dudakovićevom herojstvu i odbrani Krajine i BiH.

"Moj komentar na te snimke i uopšte na tu priču o ratnim zločinima je da je i moj otac Marko na mjestu Dudakovića ili bilo ko drugi, prvi bih ga odveo u zatvor", rekao je Komšić

Mediji u RS-u su javili da je jučer, na 17. godišnjicu zločina, u crkvi Svetih apostola Petra i Pavla u Briševu služena i spomen misa.

# V I J E S T I

## Predsjedništvo BiH



## Komšićevo saučešće Mesiću

Predsjedavajući Predsjedništva BiH Željko Komšić uputio je telegram saučešća predsjedniku Hrvatske Stjepanu Mesiću povodom željezničke nesreće u Kaštelima kod Splita.

"S velikom tugom primili smo vijest o tragičnoj željezničkoj nesreći u Kaštelima kod Splita. Stoga Vas molim da u ime Predsjedništva BiH i moje lično ime primite izraze najdubljeg saučešća. Molim Vas da porodicama poginulih prenesete da narodi BiH saosjećaju s njima u ovom teškom trenutku", navodi se u telegramu saučešća.

Komšić je poželio povrijeđenima u ovoj željezničkoj nesreći što brži oporavak.

## Kök u Bihacu



## Veliki potencijali

Austrijski ambasador u BiH Donatus Kök izjavio je jučer da bi Bihać lako mogao da nađe partnere u Austriji koji bi bili zainteresovani za ulaganje u gradske projekte. Kök je nakon sastanka sa rukovodstvom Općinskog vijeća Bihaća istakao da su posebno velika šansa IPA fondovi.

Predstavljajući projekte koji se trenutno realizuju u ovoj općini, predsjedavajući Općinskog vijeća Bihać Ivan Prša rekao je da je Bihać otvoren grad i da rukovodstvo ulaže maksimalne napore kako bi bili realizovani projekti zaštite životne sredine i obrazovanja mladih.